

中國古代版畫叢刊

第五函 函三冊

有象列仙全傳卷之三

吳郡

王世貞輯次

新都

汪雲鵬校梓

王褒字子登。范陽人。漢安國侯七世孫。少好道。入華山九年。一日夜半。忽聞林澤中有人馬簫鼓之聲。須臾漸近。見千乘萬騎。浮空而至。神人乘雲車。手把虎符。停車而呼。褒曰。吾太極真人。西梁子文也。聞子好學勤勞。故來語汝。汝名登上清。他日位當小有司。掌寶籙。為天王之任。但注心四景。勤慕三乘。道自成也。後隱洛陽山中。得遇南極夫人。西城真人。授以太上寶文。大洞真經等書。携褒觀玄洲。俄頃而至。四面大海。懸濤千丈。洲上宮闕。

樓觀悉皆瓊瑤。謂褒曰。此仙都也。太上丈人處之。又携褒入紫極宮。見丈人。丈人着流霞羽袍。冠芙蓉之冠。腰帶神劍。手把大鈴。侍女數百。太上丈人謂西城真人曰。彼所謂王子登者乎。既幸遇良師。將得之矣。真人因命褒拜畢。丈人乃授以上清隱書。龍文。八靈真經二卷。雲碧陽水。晨飛丹腴二升。褒拜服之。由是道成。上帝賜以飛鸞羽車。遍歷群仙洞府。盡傳天書秘要。上清王晨帝君。賜以寶芝食之。即身成金色。項映圓光。授為太素清虛真人。領小有天王。居王屋山洞天之中。給王童子女各三百人。主領上清玉章。及九天玄文。六合秘籍。龍輦虎旂。王輪金蓋。出入上清受事。太素宴寢太極也。

王仲都漢人也。初為道士。學道於梁山。遇太白真人。授以虹丹。能禦寒暑。二百餘年。漢元帝召至京師。試其方術。冬月。令仲都單衣。乘駟馬車。於上林昆明池。環水馳走。帝御狐裘。而猶覺寒。仲都貌無變色。背上氣蒸蒸然。又當盛夏。圍以烈火。口不稱熱。身不流汗。後仙去。孫思邈後於峨眉山。棲真習道。仲都與三五人。假為獵夫。過其居。試之。因論長生之旨。遂授思邈道焉。

樂巴。成都人。得仙道。後漢朝為尚書。正月朔日。朝見。帝賜酒不飲。向西南嚔之。有司彈奏不敬。巴謝曰。臣本縣城東。有火患。故嚔酒以救之。數日。成都果奏火災。得雨從東北來。遂息。雨中作酒氣。

徐登。漢福州人。於永泰縣高蓋山得仙。類要云。徐登與東陽趙丙。聞仙術處。即其山也。

陵陽子明。姓竇。漢銓鄉人。釣魚於涇溪。得白魚。腹中有書。即教子明服食之法。子明遂上黃山。採五石脂。服之三年。龍來迎去。唐詩。白龍已謝陵陽去。黃鶴還來喚子安。張惠明。漢趙郡人。結廬中條。遇混元子。受高奔之道。行之超群。唐太宗召。致醮有感。封妙濟大師。尋至西嶽。尸解。雞窠小兒。錢易洞微志云。李貞為承旨。奉使過海。至瓊州道。逢一翁。自称楊避舉。年八十一。其父叔皆年一百二十餘。又見其祖宋卿。年一百九十五。復見雞窠一小兒。出頭下視。宋卿曰。此九代祖。忌不食不語。不知其年。

瞿武後漢人。七歲絕粒。服黃精紫芝。入峨眉山。天竺真人授以真訣。後乘白龍而去。今蜀猶有瞿君祠。

上成公。寧縣人。棄家訪道日久。後歸語其家人曰。我已得仙。因辭訣家人。見其舉步漸高。凌虛御空。良久乃沒。陳寔韓韶共見其事。

范幼冲。遼西人。曾為漢尚書郎。善解地理。得胎化易形之道。旦旦存青白赤三氣。各如縵。從東方日下直入口中。挹之九十過。覺飽便止。行之十年。身中自有三色之氣。遂得昇仙。此高元君太素內景法。真誥范監者。即其人也。

毛伯道。劉道恭。謝稚堅。張兆期。皆後漢時人。同入王屋山。

學道四十餘年。共合神丹。伯道先服。即死。道恭服之。亦死。稚堅兆期不敢服。棄藥而歸。未出山。遙見伯道道恭各乘白鹿在山上。仙人執節從之。二人悲慟悔謝。道恭授以服茯苓方。二人後亦度世。

方回。道成。為人劫閉密室中。欲傳其道。回化身而去。更以一丸泥封其戶。以方回印印之。

陳求伯。南陽人。得淮南王七星散方。服之。二十一日忽然不知所在。求伯兄子名增。族年十七。亦服之。其父繫其足。閉於密戶中。晝夜使人守視。二十八日亦復不見。其知所之本方云。服之三十日得仙。由是後人不敢服。二人仙去時。俱有仙官來迎。但人不之見耳。

趙丙。後漢東陽人。嘗遊行。每遇故人。便酌水為酒。削一物為脯。皆得醉飽。曾至渡頭求船不得。乃布席於水而渡。呪枯樹便生花葉。

董仲。漢董永子也。母乃天之織女。故仲生而靈異。數篆符鎮驅邪。惟嘗游京山。潼泉。以地多蛇毒。書二符以鎮之。其害遂絕。今篆石在京山之陰。後仙去。

陳安世。京兆人。稟性慈仁。家貧。為權叔本家傭賃。叔本好道。有二仙人託為書生。從叔本游。叔本意怠。二仙曰。幾成而敗矣。見安世篤實。曰。汝好仙乎。曰好。二仙與約。明日早會大樹下。三期皆早至。乃以藥二丸與之。服遂不復食。但飲水。叔本知其得仙。反師事之。後安世竟仙去。

莊伯微。漢人。少好道。不知求道之方。惟以日入時。西北向閉目握固。想崑崙山。積三十年。得見崑崙山仙人。傳以金液方。合服得道。

東郭延。山陽人。服靈飛散。能夜作書。坐冥室中。身上生光。照耀一室。又能望見平地數十里小物。凡見人。即能逆知其死生。一如其言。年四百歲。絕無老狀。一旦有數十人來迎之。比鄰盡見。乃與親故辭別而去。云詣崑崙山。華子期。淮南人。師祿里先生。受隱仙靈寶方。一曰伊洛飛龜秩。二曰伯禹正機。三曰平衡方。按合服之。日以還少。一日能行五百里。力舉千斤。一歲十二易其形。後乃仙去。

蘇林字子玄。濮陽人。少稟異操。訪真之志彌篤。嘗負擔至趙師琴高先生。時年二十一。受煉氣益命之道。琴高初為周康王門下舍人。以內行補精術。及丹法。能水遊。時已九百歲。唯不死而已。非飛仙也。或乘赤鯉入水。或出入人間。而林託景丹霄。志不終此。後改師華山仙人仇先生。仇先生者。湯時木正也。服胎食之法。於還神守魄之事。大得其益。先生曰。子真人也。當學真道。我述不足躡也。乃致林於涓子。涓子見之。遂授以真訣。曰。欲作地上真人。必先服藥。除去三尸。殺滅穀虫。三尸者。一名青姑。伐人眼。令人目暗而皺。口臭齒落。盖由此青姑之氣穿鑿泥丸也。二名白姑。伐人五臟。令人心耄氣少。喜亡。

荒悶盖由白姑貫穿六腑之液也。三名血姑。伐人胃管。令人腸輪煩懣。骨枯肉焦。志意不開。所思不固。失食則飢。悲愁感嘆。精神昏怠。盖由血姑流噬魂胎之關也。若不去三尸而服藥者。谷食雖斷。虫猶不死。徒絕五味。雖勤吐納。亦無益焉。若虫生而求人不死。不可得也。故凡欲求真。當先服制虫丸。制虫丸者。一名初神去本丸也。欲作真人。當先服制仙丸。制仙丸者。太上八瓊飛精之丹也。子當急修服之。一日忽語林曰。我被帝召。上補中黃四司大夫。領北海公。今當去矣。去後。林乃於涓子寢室得書一幅。乃遺林者。其文曰。五斗三一。大帝所秘。精思二十年。三一相見。授子書矣。但有三一。長生不滅。况

復守之乎。能存三一。名刊王札。况三一相見乎。吾餌木養精三百年。服氣五百年。精思六百年。守三一三百年。守洞房六百年。守玄丹五百年。中間復周遊名山。回翔四岳。休息洞室。守形思真。二千八百餘年。今始被召。上補天位。子其最之。林省書流涕。乃奉法精修。道成。周遊天下。分形散影。寢息丘陵。賣履市巷。以試世人。人莫能識也。漢元帝神爵二年三月六日。語弟子周季通曰。我昨被玄洲召為真人。上領太極中侯大夫。今別汝矣。明日果有雲車羽蓋。驂龍駕虎。侍從數百人。迎林。林即日登天。冉冉從西北而去。

仇先生附

江妃二女。不知何許人。時鄭交甫出遊江湄。逢二女。解所佩雙明珠與之。交甫行數十步。女忽不見。珠亦隨失。劉根。京兆長安人。漢成帝時入嵩山學道。遇神人。授以秘訣。遂得仙。用術濟人。潁川太守史祈以為妖。欲戮之。遣吏召根至府。曰。能召鬼。即至。不爾當戮。根曰。甚易。但借筆書符。須臾見兵甲縛二囚廳前。祈熟視。乃父母也。即驚伏流涕。鬼責祈曰。汝何得罪神仙。乃累親至此。太守伏罪求赦。方解。根遂不見。一云。根初學道到華山。見一人乘白鹿。從十餘王女。根稽首乞一言。仙人曰。汝聞有韓衆否。曰。聞之。仙人曰。我是也。谷春。潁陽人。漢成帝時為郎。疫死。而尸不冷。家為棺殯。猶

不敢下釘。三年更着冠幘坐縣門上。邑中大驚。報家人迎之。不肯歸。發棺有衣無尸。留門上三日。去之。長安坐橫門上。家人知而追之。復去之。太白山後立祠于山上。春時間來祠中宿焉。

梅福字子真。壽春人。仕漢為南昌尉。見王莽專政。乃嘆曰。生為我酷。形為我辱。知為我毒。身為我桎梏。遂棄家求仙。遍遊鴈蕩南閩諸山。至仙霞山。遇空同仙君。授以內外丹法。入雞籠山修煉。不成。乃至劔江西嶺。再遇空同仙君。自雲中而降。謂福曰。汝緣在飛鴻山也。福遂往飛鴻山。結菴修煉。丹成。趣裝復還壽春。一日紫霧浮空。雲中樂奏。金童王女捧詔控鸞。從空而下。福拜詔辭家。乘

青鸞飛昇而去。史云。梅福知王莽必篡漢祚。一朝棄妻子去。不知所之。後人見福於會稽。變姓名為吳門市卒。今城中有吳市門。即其隱處。宋元豐間。封壽春真人。龍述字伯高。京兆人。漢建武中。為零陵太守。後于金山得神芝實。大如梧桐子。伯高治而服之。日餌一刀圭。服二年得仙。尸解去。

姚光不知何許人。得神丹。能分形散影。坐在立亡。火之。不焦。刃之不傷。吳主親試之。積柴數千束。令光坐其中。四面發火。煙焰蔽天。觀者盈都下。咸謂光必煨燼矣。火息。光從灰中振衣而起。神容晏如也。手嘗把一卷書。吳主讀不能解。後復見于唐武德中。

魏伯陽。吳人。性好道術。不樂仕宦。乃入山作神丹。時三弟子。知兩弟子心不盡誠。丹成。試之曰。金丹雖成。當先試之。犬犬無患。方可服。若犬死。不可服也。伯陽入山時。曾携一白犬。自隨。凡丹數轉未足。和合未至者。稍有毒。服之則暫死。伯陽即以丹與犬食之。犬即死。伯陽曰。作丹未成。今犬死。無乃未得神明之意耶。服之恐復如犬。奈何。弟子曰。先生服之不。伯陽曰。吾背違世路。委家于此。不得仙。吾亦耻歸。死與生同。吾當服之。伯陽服丹。入口即死。一弟子曰。師非凡人也。服丹而死。得無有意乎。亦服之。入口亦死。二弟子乃相謂曰。作丹求長生爾。今服丹即死。不如不服。尚得數十年活。遂不服。乃共出山。欲

為伯陽及死。弟子求殯具。二人去後。伯陽即起。將煉成妙丹。納死弟子及犬口中。須臾皆活。於是將服丹。弟子姓虞者。同犬仙去。逢入山伐薪人。作手書寄謝二弟子。弟子見書。始大懊惱。伯陽嘗作衆同契。五相類。凡二卷。其說似解周易。其實假借爻象以寓作丹之旨。

虞生附

王老。村居慕道。有老道士造之。留月餘。忽遍身瘡瘍。謂王老曰。得酒數斛浸之。方愈。王老遂置酒滿甕。道士坐甕中。三日方出。鬚髮皆黑。顏如少童。謂王老曰。能飲此酒。可仙去。時正打麥。王老全家飲之。須臾皆醉。忽風動雲蒸。一時舉舍皆昇天而去。時人猶聞空中打麥聲。

張道陵字輔漢。子房八世孫。身長九尺二寸。顰眉廣額。朱頂綠睛。隆準方頤。目有三角。伏犀貫頂。王枕峯起。垂手過膝。美髭髯。龍蹲虎步。豐下銳上。望之儼然。漢光武建武十年。生於天目山。母初夢大人。自北魁星中降至地。長丈餘。衣繡衣。以薔薇香授之。既覺。衣服居室皆有異香。經月不散。感而有孕。及生日。黃雲籠室。紫氣盈庭。室中光氣如日月。復聞昔日之香。浹日方散。七歲通道德經。天文地理。河洛圖緯之書。皆極其奧。舉賢良方正。身雖仕。而志在修煉。無何。隱北邙山。有白虎銜符文置座傍。和帝徵為太傅。封冀縣侯。三詔不就。入蜀。愛蜀中溪嶺深秀。遂隱於鶴鳴山。山有石鶴。每鳴則有得道者。道

陵居此。苦節學道。蓄氣養神。鶴乃鳴。弟子有王長者。習天文。通黃老。相與煉龍虎大丹。一年有紅光照室。二年有青龍白虎。遶護丹鼎。三年丹成。真人年六十餘。餌之若三十許人。行及奔馬。與王長入北嵩山。遇繡衣使者。告曰。中峯石室。藏上三皇內文。黃帝九鼎。太清丹經。得而修之。乃昇天也。於是真人齋戒七日。入石室。足所履處。蹇然有聲。即掘其地。取之。果得丹書。精思修煉。能飛行。遙聽得分形散影之妙。每泛舟池中。誦經堂上。隱几對客。杖藜行吟。一時並赴。人皆莫測其靈異。西城房陵間。有白虎神。好飲人血。每歲其鄉殺人祭之。真人召其神戒之。遂滅。又梓州有大蛇。鳴則山石振動。時吐毒霧。

行人中毒。輒死。真人以法禁之。不復為害。順帝壬午歲正月十五夜。真人在鶴鳴山夢覺。惟聞鑾佩珊珊。天樂隱隱。香花覆地。紫雲滿空。瞪目東瞻。見紫雲中素車一乘。駕五白龍。車傍旌旗儀衛甚盛。車中一神人。容儀若冰王。手執五明寶扇。項負八景圓光。身丈六餘。神光照人。不可正視。車前一人。勅真人曰。子勿驚怖。即太上老君也。真人禮拜。老君曰。近蜀中有六大鬼神。枉暴生民。深可痛惜。子其為吾治之。使晝夜各分。人鬼有別。以福生靈。則子功無量。而名錄丹臺矣。乃授以正一盟威秘籙三清衆經九百三十卷。符籙丹竈秘訣七十二卷。雌雄劍二把。都功印一枚。冠衣方裙朱履各一副。且曰。與

子千日為期。後會闕苑。真人乃叩頭領訖。日味秘文。按法遵修。千日內顧五臟。外集三萬六千神。又感王女教。以吐納清和之氣。攝伏精邪。符籙中三步九迹。魁罡七元。交乾履斗之道。隨其所指。隱遁出沒。皆得自然。時有八部鬼神。各領鬼兵。動億萬數。周行人間。劉元達領鬼行。雜病。張元伯行瘟病。趙公明行下痢。鍾子季行瘡腫。史文業行寒瘡。范巨卿行酸痛。姚公伯行五毒。李公仲行狂魅。赤眼。噓毒。嘯禍。暴殺萬民。枉天無數。真人奉老君誥命。佩盟威秘籙。往青城山。置琉璃高座。左供大道元始天尊。右置三十六部真經。立十絕靈幡。周匝法席。鳴鐘扣磬。布龍虎神兵。衆鬼即挾兵刃。矢石來害真人。

真人舉手一指化為一大蓮花拒之。鬼衆復持火千餘炬來。真人舉手一指鬼反自燒。遙謂真人曰。師自住峨嵋山。何為來侵奪我居處。真人曰。汝等殘害衆生。所以來伐汝攢之西方不毛之地。奉老君命也。元達等聞怒。乃會鬼帥兵馬各千萬衆。精甲犀刃。上山圍遶。真人以丹筆遙畫一陣。鬼衆皆仆。八大王叩頭求生。真人以丹筆倒書之。鬼衆復蘇。真人呼鬼王曰。汝等進前聽吾處分。自今速當遠避。勿復行病人間。如違。即當誅戮。無留種。鬼王曰。降災下民。本自隸我。奈何盡奪。願分一半。真人不許。叱退之。鬼王不服。次日復會六大魔王率鬼兵百萬環攻。王長曰。鬼甚衆。奈何。真人曰。子無恐。吾即却

之。復以丹筆一畫。衆鬼復死。惟六魔王仆地。不能起。仍扣頭求生。真人不顧。復以丹筆一畫。此山遂分為二。六魔王欲度。不能。始大聲哀求云。自今而去。不敢復來。乞往西方娑羅之國而居止焉。真人乃許可之。倒筆再畫。八師六魔。群鬼悉起。真人命王長有一大石為橋。度之。然群鬼雖攝伏。真人猶欲服其心。謂之曰。試與爾各盡法力。元達等曰。惟命是聽。真人投身入大火中。即足履青蓮而出。鬼帥投火。為火所燒。真人入木。身度木外。木即隨合。鬼帥投木。即墜地。真人入水。乘黃龍而出。鬼帥入水。為水所溺。真人以身入石。透石而出。鬼帥投石。纏入一寸。真人以身入鉄山。透山而出。鬼帥纏入半寸。真

人呪神符一道。左手指之。鬼斃。右手指之。復生。鬼帥左右指。無生無死。元達等化八大虎。奔攫而來。真人化一獅子逐之。虎奔走。鬼帥又化八大龍。欲來擒師。真人化金翅鳥。啄龍目睛。八龍爭遁。鬼帥又化大神。雙持大槓。欲擊真人。真人化作金剛。身長七十二萬丈。廣五十三萬圍。戴大冠。負圓光。具十二種無量相。擊大神。大神退走。鬼帥等身高十二丈。即墜。真人騰空。高百餘丈。上無所攀。下無所乘。鬼帥作五色雲。昏暗天地。真人化五色日。炎光輝灼。雲即流散。鬼帥變化技窮。真人乃化一大石。可重萬餘斤。以藕絲懸之。鬼帥營上。令二鼠爭齧其絲。欲墮。鬼帥同聲哀告。乞餘生。遠去。再不虐害生民。真

人遂命五方八部。六大鬼神。會盟于青城山。使人處陽明。鬼行幽暗。六大鬼王歸於北鄴。八部鬼帥竄於西域。鬼衆猶躊躇不去。真人乃口勅神符一道。飛上層霄。須臾風雨雷電。刀兵畢至。群鬼滅影而遁。真人至蒼溪縣雲臺山。謂王長曰。此山乃吾成功飛騰之地也。遂卜居。修九還七返之功。一日復聆昔日鑾珮天樂之音。真人整衣叩伏。見老君千乘萬騎。來集雲際。徘徊不下。真人再拜泣曰。臣夙昔承寶蔭。親授秘文。乃奉天威。戰鬼行化。功成退居於此。今飈駕再臨。不我下降。意者大道離臣。臣其為尸敗乎。老君乃命使者告曰。子之功業。合得九真上仙。吾昔使子入蜀。但奪鬼幽獄。區別人鬼。以布

清淨之化。而子殺鬼過多。又擅興風雨。役使鬼神。驅馳星斗。震蕩山川。陰翳晝殺。氣穢空殊。非大道好生之意。上帝正責子之過。所以吾不得近子也。子且退居勤行。修謝日月。二十八宿。二十四氣。陰陽本命主者。謝過之後。更修三千六百日。吾待子於無何有鄉。上清八景宮中。言訖。聖駕昇去。真人遂依告文。與王長遷鶴鳴山。謂弟子趙昇曰。彼處有妖怪。當往除之。及至。值十二神女于山前笑迎。姿態妖艷。因問曰。此地有鹹泉何在。神女曰。前大湫是毒龍處之。真人廼以法召之。毒龍不出。遂書一符化為金翅鳥。向湫上盤旋。毒龍驚舍湫而去。其湫即竭。遂得鹹泉。後居民煮之有鹽。十二神女各出。

一王環來獻曰。妾等願事箕箒。真人受其環。以手緝之。十二環合而為一。謂曰。吾投此環于井中。能得之者。應吾夙命也。神女競解衣而入井。爭取王環。真人遂掩之。盟曰。令作井神。無得復出。彼方之民。至今不懼神女之害。而獲鹹井之利。後以真人諱。旌其州。今陵州是也。過宋江。其中多異物為害。乃書大山篆符以鎮之。其害遂絕。每水涸。人猶見其符。暮歸以屏妖惡。真人重修二十年。乃復領趙昇王長往鶴鳴山。一日午時。忽見一人朱衣青襟。曳履執板。一人黑幘。綃衣佩劍。捧一玉函。進曰。奉上清真符。召真人遊閬苑。須臾前後從引千乘萬騎。紛然而來。中有黑龍駕一紫輦。王女二人引真人登車。

旋踵至闕。闕榜云。擬太玄都正一真人闕。真人既至。群仙禮謁良久。忽二青童引群仙。皆朱衣絳節前導。曰。老君至矣。從者二人可二十許。或曰。此子房子淵也。乃相與騰空而上。至一殿。金堦玉砌。或謂真人曰。將朝太上元始天尊也。真人整衣趨進。望見殿上圓光照人。不可正視。移時。殿上勅青童諭真人以正一盟威之法。使世世宣布。為人間天師。拜真人為太玄都正一平炁三天扶教輔元大法師。勅還人間。勸度未悟。仍密諭飛昇之期。真人受命。乃復返渠亭赤石崖舍。出三天正一秘法。付王長趙昇。於離沅山中敷演其法。次還陽平山。以飛仙輕舉之法。付嗣師。仍還鶴鳴山。桓帝永壽元年正月。

七日五更初。長昇見空中一人駕雲車。大聲言曰。張道陵功已行就。將授以秘錄。言訖。老君駕龍輿。命真人乘白鶴同往。成都重演正一盟威之旨。說北斗南斗經畢。老君復去。真人欲留其神跡。乃於雲臺西北半崖間。舉身躍入石壁中。自崖頂而出。其山因成二洞。今崖半曰峻仙洞。崖上曰平仙洞。九月九日。在巴西赤城渠亭山中。上帝遣使者持玉冊。授真人正一真人之號。諭以行當飛昇。真人乃以盟威都功等諸品秘錄。斬邪二劍。王冊玉印。以授其長子衡。戒之曰。此文總統三五步罡正一之樞要。驅邪誅妖。佐國安民。世世一子紹吾之位。非吾家子孫。不傳。謂長昇曰。尚有餘丹。二子可分餌之。今

日當隨吾上昇矣。亭午。群仙儀從畢至。王女二人引真人夫人雍氏并登黑龍紫輿。天樂擁導於雲臺峯。白日昇天。時真人年一百二十三歲也。今其子孫世襲真人。居於江西廣信府貴溪縣之龍虎山。

劉晨。剡縣人。漢永平中。與阮肇入天台山採藥。路迷不得返。經十三日。飢渴偶望山上有桃樹。子實共取食之。飢止體充。下山取澗水飲。見一杯流出。中有胡麻飯焉。二人喜曰。此近人家矣。遂度山。出一大溪。溪邊有二女子。色甚美。見二人持杯。顧笑曰。劉阮二郎捉杯來耶。劉阮異之。二女遂慍然如舊相識。曰。來何晚。即邀還家。南壁東壁各有羅帷絳帳。帳角懸鈴。上有金銀交錯。各有侍

婢。便令具饌。有胡麻飯。山羊脯。牛肉。甚甘美食畢。行酒。俄有群女持桃子笑曰。賀汝婿來。酒酣作樂。夜半各就一帳宿。婉態殊絕。至十日求還。苦留半年。氣候草木常似春。百鳥啼啁歸思更切。二女曰。罪根未滅。使君等至此。遂相送指示還路。及歸。鄉邑零落。已七世矣。再往女家。尋覓不獲。晉太康八年。失二人所在。

沈文泰。九疑人。得紅泉丹砂去土符。延年益命之方。服之有效。欲之崑崙。留安息二十餘年。嘗語李文淵曰。但服土符。而不服藥行道。無益也。文淵因得秘要。後亦昇仙。後世以竹根汁煮丹。及黃白去三尸法。出此二仙矣。

文淵附

王喬。河東人。漢明帝時為尚書郎。出為葉令。漢法畿內長史。節朔還朝。喬每月朔旦常自縣來朝。帝怪其來數而不見車騎。密令太史伺望之。言其臨至。輒有雙鳬從東南飛來。於是候鳬至。舉羅張之。得二鳬焉。乃所賜尚書官屬履也。每當朝時。葉縣門外鼓不擊。自鳴聞于京師。後天下王棺於堂前。吏人推排終不移動。喬曰。毋乃天帝召我耶。乃沐浴服飾。寢其中。蓋便立覆。勿于城東自成墳。其夕縣中牛皆流汗喘乏。而人無知者。百姓為之立廟。號葉君祠。祈禱輒應。

蕭基。漢末彰德人。修道天平山。延壽宮。善吹簫。能致鳳鸞。翔集。號碧霄真人。道成。白日中舉。

王遠。字方平。東海人。仕漢至中散大夫。博學。兼明天文圖讖。河洛之要。能逆知吉凶。桓帝連徵不出。後詔郡國逼至京。低頭閉目。不肯答語。乃題宮門扇四百餘字。皆言方來事。帝惡之。使人削去。外字適去。內字復見。墨深透木。寄寓太尉陳耽家。四十餘年。耽家絕無疾病死喪。一日語耽云。吾期運當去。不得復停。明日日中當發。至時方平死。耽知其化去。未敢殯斂。但悲涕焚香。三日三夜。失其所在。衣帶不解。如蛇蛻。方平去後百餘日。耽亦薨。或謂耽得方平之道。亦化去。

蔡經。姑蘇人。漢桓帝時。仙人王方平降其家。曰。汝當得度世。故來教汝。但汝氣少肉多。未能即上天。當作尸解。須

史經如從狗竇中過。方平告以要言。乃去。經後忽身發熱如火。三日肉消骨立。乃入室以被自覆。忽然失其所。在視其被中。但有形如蛇蛻。後十餘年。忽還家。尸解時已老。今復少壯。鬚髮盡黑。語家人曰。七月七日。王君復來。當作酒數百斛以待。其日方平果來。舉家聞金鼓簫管之聲。方平著遠游冠。五色綬帶。劔面黃色。少鬚。乘五龍車。車各異色。前後摩節。旌旗導衛。如大將軍侍從。既至。從官皆隱。經父兄叅畢。方平乃遣人迎麻姑。麻姑即方平之妹也。少頃。麻姑至。經舉家見之。是好女子。年可十八許。頂中作髻。餘髮散垂至腰。錦衣綉裳。光彩耀目。皆世所無。有坐定。自進行厨。擗麟脯。噐皆金王。麻姑欲

見經母及經婦。時經婦新產。方數日。麻姑望見。乃知之。曰。噫。且止勿前。索少許米來。擲地皆成丹砂。方平笑曰。麻姑猶作少年戲也。姑云。接行以來。東海三為桑田。蓬萊水又淺矣。方平亦曰。聖人皆言海中行復揚塵也。麻姑手似鳥爪。蔡經私念背痒時。得此爪搔之。佳。方平即知。乃鞭經背曰。麻姑神人也。汝謂其爪可搔背痒耶。方平去。經家所作數百斛酒皆盡。亦不見人飲之也。父母私問經。王君常在何處。經曰。常在崑崙羅浮括蒼三山。三山皆有宮室。王君常平天曹事。一日之中。與天仙往還者數十過也。王君出入常乘一黃麟。所至山海之神皆來奉迎。後經仙去。仍暫歸省家。如蘇耽云。麻姑附

子英者。舒鄉人。善入水捕魚。得赤鯉。愛其色好。養之池中。一年。長丈餘。遂生角與翼。子英怪異。拜謝之。魚言我來迎汝。今日與汝俱昇天。即大雨。子英上魚背飛昇而去。歲七來歸。仍與妻子同飲食。數日魚復來迎之。如此七十年。故吳中有子英祠云。

于吉。琅琊人。精修苦道。忽得痼疾。晨夕告天。誠感老君。令仙翁授吉經。曰。非但愈疾。當得長生。化行天下。吉得之。疾遂除。凡消灾治病。無不立驗。後老君數降。親授其旨。孫策平江東。將士多病。請吉。嚙水即差。策惡之。天久旱。乃縛吉暴日中。即大雨。策忌而殺之。俄失其尸。周旋人間。復百餘年仙去。

宮嵩琅瑯人。師事仙人于吉。服雲母數百歲。面色如童。後入紵嶼山仙去。

董奉字君異。侯官縣人。蜀先主時。有本縣長余姓者。方少年。見奉年已三十餘矣。不知其有道也。罷去五十年。復為他職。經侯官。諸吏人皆往謁。故長奉亦同往。余宿識奉。問曰。君莫得道耶。昔在縣時。年幼於君。今已衰白。而君猶少。何也。奉曰。偶爾。後奉游交州。州刺史杜燮得毒病死。已三日。奉以三丸藥內燮口中。令人舉頭搖而消之。食頃。燮開目。動手足。顏色漸還。半日中能起坐。後四日始能語。云。死時奄然如夢。見數十鳥衣人來收之。將載露車上去。入大赤門。徑以付獄。獄各一戶。戶總容一

人以燹內一戶中似以土外封之不復見恍惚間有一人言太一使者來召杜燹聞人以鋪掘所閉戶引出之見外有車馬赤蓋三人共坐車上一人持節呼杜燹上車將還至門而覺燹既活乃為奉起高樓于中庭奉所飲食唯啖脯棗多喜飲酒一日三為設之奉每來燹處飲食下樓時如飛鳥便來到座不覺其下其上樓亦然後求去燹涕泣留之不許因問曰君欲何之當為具大船也奉曰不用船但用一棺器耳燹即為具之至明日日中時奉死燹使人殯埋之七日有人從岩昌來者云見奉寄言為謝杜侯好自愛重燹開棺視之但見一帛丹書一符奉後還廬山下居有一人病癰垂死自載詣

奉扣頭乞哀奉使病者坐一空室中以五重布掩其目勅家人莫近無何病人云似有一物來舐之痛不可堪度此物舌當一尺許其氣息大小如牛舐竟乃去竟不知何物奉乃往解病人之布以水與飲遣去云不久當愈且勿當風十數日間病者身體通赤無皮甚痛欲水浴即不復痛二十餘日即皮生如凝脂後嘗大旱百谷焦枯縣令丁土產謂綱紀曰董君有道必能致雨乃自齋酒脯見奉奉曰雨易得爾因仰視其屋曰但家貧屋漏奈何縣令解其意即遣人為奉造屋當泥塗使人取水作泥奉曰不煩運水日暮自當雨也夜果大雨高下皆是奉居山間呪水治病不取錢物重病愈者但使栽

杏五株輕者一株如此數年計得杏七萬餘根森然成林山中群獸遊戲樹下竟不生草有如耘治也杏每熟時奉於樹下作一簞倉語人曰欲買杏者不須來報徑自取之但將穀一器置倉中即自取杏一器每有納穀少而取杏多者即有虎隨後逐之其多取杏即傾覆地上虎即還去有偷其杏者至家即死其家速送杏還叩頭謝過即活自是買杏更無欺者奉以其所得糧穀賑救貧窮供給行旅歲消三千斛穀尚有餘縣令親故家有女為精邪所魅諸術不能治乃語奉曰君若能愈之即當以此女傳巾櫛奉乃召勅諸魅有大白鼉長丈六尺陸行詣病者門奉勅使者斬之女病輒愈遂以女妻

之久無兒息奉每出行妻不能獨住乃買一女伴之奉一旦受上帝命授碧虛太一真人白日飛昇婦及養女猶守其宅賣杏取給有欺之者虎逐之如故後人即於其種杏處建祠祀之封衡隴西人幼學道得真訣服黃連五十年入山採藥百餘年還鄉里聞有病者輒以腰間竹筒藥與之立應復周游天下駕一青牛鬼物遇之莫不竄避魏武帝召問養性大畧衡曰減思慮節嗜欲而已所著有養氣術隱形法衛生經數十卷介象字元則會稽人通五經百家之言能屬文精修道法入東嶽受禁制之術能茅上焚火煮鷄鷄孰而茅不焦

能令一里內不炊不蒸。鷄犬三日不鳴不吠。能令一市人皆坐不起。能隱形變化。為草木鳥獸。嘗遠遊數千里求仙。不值。乃入山精思。異遇仙。疲極。卧石上。有一虎欲噬象。象寤見虎。謂之曰。若天使汝來侍衛我。汝且停。若山神使汝來試我。汝速去。後入穀山。見石子有紫光。大如雞子。因取兩枚。穀水深。不得度。還見一美女。年十五六許。顏色非常。衣服五彩。象知其仙人也。即叩首乞長生之方。女子曰。汝急送手中物還故處。吾于此待汝。象以石子置原所。還見女子。果在舊處。象復叩首。女曰。汝血食之氣未盡。斷穀三年。更來。吾止此。象歸。斷穀三年。乃復往見。女仍在前處。出丹方一首授象。曰。得此便仙。

勿他為也。象尚未合藥。有人密奏象于吳主。吳主徵象至武昌。甚敬重之。稱為介君。為起第宅。以御帳給之。賜遺前後累千金。從象學隱形之術。試還後宮。莫有見者。又令象變化種瓜菜百果。皆立生。時有種黍于山中。苦獼猴食之。戒曰。吾告介君。猴即去。一日吳主與象論鱸。何者最上。象曰。鱸魚為上。吳主曰。此魚生海中。可得乎。象曰。可得。但令于殿前掘坎。著水滿之。象垂釣坎中。須臾得鱸。吳主驚喜。問象曰。可食否。象曰。故為陛下取作鱸。何不可食。象屢求去。不許。一日吳主賜梨一奩。象食之。隨死。吳主殯埋之。次日已至建業。以所賜梨付苑吏種之。吏後以表聞。吳主視其棺。中惟一奏版符耳。吳主

思象。即以象所住屋為祠。時躬祭之。每有白鶴來集座上。良久乃去。後弟子又見象在蓋竹山中。持白桃花一枝。顏更少焉。

鍾離簡。後漢人。任為郎中。與弟樵。入華山三峯。得道。白日昇天。

鍾離樵。燕臺人。後改名覺。字寂道。號和谷子。又號王陽子。又號雲房先生。父為列侯。宦雲中。誕生真人之時。異光數丈。狀若烈火。侍衛皆驚。真人頂圓額廣。耳厚眉長。目深鼻聳。口方頰大。唇臉如丹。乳遠臂長。如三歲兒。晝夜不聲不哭不食。第七日。躍然而言曰。身遊紫府。名書王京。及壯。任漢為大將。征吐蕃失利。獨騎奔逃山谷。迷路。

夜入深林。遇一胡僧。蓬頭拂額。體掛草結之衣。引行數里。見一村庄。曰。此東華先生成道處。將軍可以歇息矣。揖別而去。真人未敢驚動莊中。良久聞人語云。此必碧眼胡人。饒舌也。一老人披白鹿裘。扶青藜杖。抗聲前曰。來者非漢大將軍鍾離樵耶。汝何不寄宿山僧之所。真人聞而大驚。知其為異人也。是時方脫虎狼之穴。遽有鸞鶴之思。乃回心向道。哀求度世之方。於是老人授以長真訣。及金丹火候。青龍劍法。真人告辭出門。回顧莊居。不見其處。後再遇華陽真人。傳以太乙刀圭。火符內丹。洞曉玄玄之道。又遇上仙王玄甫。得長生訣。遊雲水至魯。居鄒城。入崆峒。於紫金四皓峯居之。再得王匣秘。

死仙傳卷之三
訣遂仙去。

劉諷，潁川人。漢景帝時，為公車司馬。師司馬季主，得服日月精華之道，晚歸鄉里，託形杖履而去。

介琰，不知何許人，住建安方山。師白羊公杜泌，受玄一無為之道，能變化隱形，嘗往東海，過秣陵。吳主孫權禮之，為琰起靜室，每日數遣人問起居。琰或為童子，或為老翁，無所食啖，不受餉遺。吳主欲學其術，琰以吳主多內御，不傳。吳主怒，縛琰著甲士，引弩射之，弩發，唯繩索存，不知琰之所之。

李阿者，三國時蜀人，容顏常不老，每乞食成都市，所得隨多少，盡施與貧乏者。夜去朝還，市人莫知其踪跡。有古

强者，疑阿是異人。試尾阿還所宿，乃在青城山中。強每親隨之，恐山中有虎狼，私持其父大刀。阿見而怒曰：「汝隨我行，那畏虎也？」取刀擊地，刀折。強憂之，至旦，阿問強曰：「汝憂刀折耶？」曰：「實恐父責。」阿復取刀擊地，刀完如故。強一日隨阿還成都，道逢人犇車，阿以足當車下，足骨折，輒死。強守視之，須臾，阿復起，折足平好如故。強時十八，見阿如五十許人。至強年八十餘，而阿容色如舊。一日忽語人曰：「吾被崑崙召，當去，遂不復見。」

朱孺子，三國時永嘉固人。幼師道士王玄真，居大若岩，深慕仙道。時採黃精服餌，歷十餘年，嘗於溪畔見二花犬逐之，入枸杞叢下，與玄真共掘其處，得二枸杞根形

狀，即如花犬，堅若石。乃煮之三晝夜，孺子試取汁飲之，即覺身輕，能飛昇於前峯之上。與玄真謝別，乘雲而去。至今號其峯為童子峯。玄真後食其餘，亦得不死。乃隱于若西陶山，採樵者時或見之。王玄真附

左慈，字元放，廬江人。於天柱山中精思學道，得石室中丹經，尤明六甲，能使鬼神坐致行厨，變化萬象。曹操召見，閉一室，斷穀暮年，出之，顏色如故。操嘗宴賓，曰：「今日高會，所少松江鱸耳。」慈因求銅盆貯水，以竿釣之，即得鱸。操曰：「恨無蜀薑。」慈曰：「易得。」操恐近取，即曰：「前使買錦，可報增二十段。」慈曰：「諾。」須臾，袖中出薑，後買錦者回，果云是日得報增錦。操出郊，士大夫從者百許，慈為齋酒一

升，脯一斤。手自斟酌，百官莫不醉飽。操怪之，使求其故。行視諸壚，悉亡其酒脯矣。操惡其怪，因坐上收慈，欲殺之。慈乃卻入壁中。霍然不知所在。或見於市者，捕之，而市人皆變形與慈同，莫辨誰是。或逢慈於陽城山頭，因復逐之，遂走入羊群。操知不可得，乃令使告之曰：「不復相殺，本試君術耳。」忽有一老羝屈前兩膝，人立而言曰：「遽如許，使欲取之，而群羊數百皆變為羝，並人立云：『遽如許，亦莫所取焉。』」

張魯，字公期，嗣師長子也。仕漢為漢中太守。後隱身學道，以符法治病，致米一斗，病立愈。久之，積米鉅萬。曹操遣將攻漢中，魯以手版畫地成河，怒濤洶湧，兵不得渡。其

將復率水兵。將至岸。魯又以手版畫河中輒聳一峯。高千餘丈。兵不能進。後加修煉。白日昇天。

王梵志。黎陽人。王德祖有林檎樹。生癭大如斗。癭爛。德祖去其皮。見一孩兒。抱胎而出。七歲能語。問誰育我。德祖以實告。因名梵天。後改為志。後仙去。時人咸謂神仙轉劫也。

有象列仙全傳卷之三終





樂巴

